

四庫全書

集部

欽定四庫全書

集部

漢魏六朝百三家集卷

二十一

詳校官庶吉士臣謝恭銘

主事銜臣徐以坤覆勘

總校官檢討臣何思鈞

校對官編修臣祖之望

謄錄監生臣蕭肇鶴

欽定四庫全書

漢魏六朝百三家集卷二十

漢王逸集題詞

屈原在楚平王時以忠被疎作離騷經頃襄王
立放之江南復作九歌天問九章遠遊卜居漁
父大招自沈汨羅其後楚宋玉作九辯招魂漢
賈誼作惜誓淮南小山作招隱士東方朔作七
諫嚴忌作哀時命王褒作九懷劉向作九歎皆

擬其文漢武時淮南王安始作離騷傳向典校
經書分為十六卷東京班固賈逵各作離騷章
句餘十五卷闕而不說至王逸復作十六篇章
句又續為九思取班固二序附之為十七篇今
世所行離騷皆王本也東漢文苑王叔師父子
皆有名文考靈光殿賦與夢賦二篇世共傳誦
叔師文少有習者讀離騷乃見之矣文字存亡
常有時命或存已集或附他書俱可不敝天壤

叔師騷註即不能割本書獨行然自以為與原
同產南陽土風哀思有足親者章句諸篇與遺
文並錄不類巨山詩序康成詩譜哉

目錄

賦

機賦

荔支賦

楚辭序

楚辭章句序

離騷經章句序

九歌章句序

天問章句序

九章章句序

遠遊章句序

卜居章句序

漁父章句序

九辨章句序

招魂章句序

大招章句序

惜誓章句序

招隱士章句序

七諫章句序

哀時命章句序

九懷章句序

九歎章句序

論

折武論

騷

九思

逢尤

怨上

疾世

憫上

遭厄

悼亂

傷時

哀歲

守志

詩

琴思楚歌

漢魏六朝百三家集卷二十目錄

欽定四庫全書

漢魏六朝百三家集卷二十

明 張溥 輯

漢王逸集

賦

機賦

帝軒龍躍庶業是昌俯覃聖恩仰覽三光爰制布帛始垂衣裳於是取衡山之孤桐南嶽之洪樟結靈根於盤

石託九層於巖傍性條暢以端直貫雲表而剴良儀鳳
晨鳴翔其上怪獸羣萃而陸梁於是迺命匠人潛江奮
驤踰五嶺越九岡斬伐剖析擬度短長勝復迴轉克像
乾形大匡淡泊擬則川平光為日月益取昭明三軸列
布上法台星兩驥齊首儼若將征方圓綺錯微紗窮奇
蟲禽品獸物有其宜兔耳跼伏若安若危猛獸相守竄
身匿蹄高樓雙峙下臨清池遊魚銜餌灑灑其陂鹿盧
竝起纖綴俱垂一往一來匪勞匪疲於是莫春代謝朱

明達時蠶人告訖舍罷獻絲或黃或白密蠟凝脂纖纖
靜女經之絡之爾乃窈窕淑媛美色貞怡解鳴珮釋羅
衣披華幕登神機乘輕杼覽牀帷動搖多容俯仰生姿

荔支賦

暖若朝雲之興森如橫天之彗湛若大厦之容鬱如峻
嶽之勢修幹紛錯綠葉蓊蓊灼灼若朝霞之映日離離
如繁星之著天皮似丹罽膚若明璫潤侔和璧奇喻五
黃仰歎麗表俯嘗嘉味口含甘液心受芳氣兼五滋而

無常主不知百和之所出卓絕類而無儔超衆果而獨貴

楚辭序

楚辭章句序

序曰昔者孔子叡聖明詒天生不王俾定經術乃刪詩書正禮樂制作春秋以爲後王之法門人三千罔不昭達臨終之日則大義乖而微言絕其後周室衰微戰國並爭道德陵遲譎詐萌生於是楊墨鄒孟孫韓之徒各

以所著造傳記或以述古或以明世而屈原履忠被
譖憂悲愁思獨依詩人之義而作離騷上以諷諫下以
自慰遭時暗亂不見省納不勝憤懣遂復作九歌以下
凡二十五篇楚人高其行義瑋其文采以相教傳至於
孝武帝恢廓道訓使淮南王安作離騷經章句則大義
粲然後世雄俊莫不瞻仰攄舒妙思續述其詞逮至劉
向典校經書分以為十六卷孝章即位深弘道藝而班
固賈逵復以所見改易前疑各作離騷經章句其餘十

五卷闕而不說又以壯為狀義多乖異事不要撮今臣復以所識所知稽之舊章合之經傳作十六卷章句雖未能究其微妙然大指之趣略可見矣且人臣之義以中正為高以仗節為賢故有危言以存國殺身以成仁是以伍子胥不恨于浮江比干不悔于剖心然後德立而行成榮顯而名稱若夫懷道以迷國佯愚而不言顛則不能扶危則不能安婉婉以順上逡巡以避患雖保黃耆終壽百年蓋志士之所恥愚夫之所賤也今若屈

原膺忠貞之質體清潔之性直若砥矢言若丹青進不
隱其謀退不顧其命此誠絕世之行俊彥之英也而班
固謂之露才揚己競於羣小之中怨恨懷王譏刺椒蘭
苟欲求進強非其人不見容納忿恚自沈是虧其高明
而損其清潔者也昔伯夷叔齊讓國守志不食周粟遂
餓而死豈可復謂有求於世而恨怨哉且詩人怨主刺
上曰嗚呼小子未知臧否匪面命之言提其耳風諫之
語於斯為切然仲尼論之以為大雅引此比彼屈原之

詞優游婉順寧以其君不知之故欲提攜其耳乎而論者以為露才揚己怨刺其上強非其人殆失厥中矣夫離騷之文依託五經以立義焉帝高陽之苗裔則詩厥初生民時惟姜嫄也紉秋蘭以為佩則將翺將翔佩玉瓊琚也夕擘洲之宿莽則易潛龍勿用也駟玉虬而乘鸞則易時乘六龍以御天也就重華而陳詞則尚書咎繇之謀謨也登崑崙而涉流沙則禹貢之敷土也故智彌盛者其言博才益劬者其識遠屈原之詞誠博遠矣

自孔丘終後以來名儒博達之士著造詞賦莫不擬則其儀表祖式其模範取其要妙竊其華藻所謂金相玉質百歲無匹名垂罔極永不刊滅者也

離騷經章句序

離騷經者屈原之所作也屈原與楚同姓仕于懷王為三閭大夫三閭之職掌王族三姓曰昭屈景屈原序其譜屬率其賢良以厲國士入則與王圖議政事決定嫌疑出則監察羣下應對諸侯謀行職修王甚珍之同列

大夫上官靳尚妬害其能共譖毀之王乃疏屈原屈原
執履忠貞而被譖袞憂心煩亂不知所愬乃作離騷經
離別也騷愁也經徑也言以放逐離別中心愁思猶陳
直徑以風諫君也故上述唐虞三代之制下序桀紂羿
澆之敗冀君覺悟及于正道而還已也是時秦昭王使
張儀譖詐懷王令絕齊交又使誘楚請與俱會武關遂
脇與俱歸拘留畱不遣卒客死于秦其子襄王復用讒言
遷屈原于江南而屈原放在山野復作九章援天引聖

以自證明終不見省不忍以清白久居濁世遂赴汨淵
自沈而死離騷之文依詩取興引類譬諭故善鳥香艸
以配忠貞惡禽臭物以比讒佞靈修美人以媲于君宓
妃佚女以譬賢臣虬龍鸞鳳以託君子飄風雲霓以為
小人其詞溫而雅其義皎而朗凡百君子莫不慕其清
高嘉其文采哀其不遇而閔其志焉

九歌章句序

九歌者屈原之所作也昔楚南郢之邑沅湘之間其俗

信鬼而好祀其祠必作樂鼓舞以樂諸神屈原放逐竄伏其域懷憂苦毒愁思怫鬱出見俗人祭祀之禮歌舞之樂其詞鄙陋因為作九歌之曲上陳事神之敬下以見已之寃結託之以風諫故其文意不同章句雜錯而廣異義焉

天問章句序

天問者屈原之所作也何不言問天天尊不可問故曰天問也屈原放逐憂心愁悴彷徨山澤經歷陵陸嗟號

是吳仰天嘆息見楚有先王之廟及公卿祠堂圖畫天地山川神靈琦瑋儵倬及古賢聖怪物行事周流罷倦休息其下仰見圖畫因書其壁呵而問之以滌憤懣舒瀉愁思楚人哀惜屈原因共論述故其文義不次敘云敘曰昔屈原所作凡二十五篇世相教傳而莫能說天問以文義不次又多奇怪之事自太史公口論道之多所不逮至於劉向揚雄援引傳記以解說之亦不能詳悉所闕者衆多無聞焉既有解說乃復多連蹇其文濛

頌其說故厥義不昭微指不皙自游覽者靡不苦之而不能照也今則稽之舊章合之經傳以相發明為之符驗章決句斷事事可曉俾後學者永無疑焉

九章章句序

九章者屈原之所作也屈原於江南之壘思君念國憂思罔極故復作九章章者著明也言已所陳忠信之道甚著明也卒不見納委命自沈楚人惜而哀之世論其詞以相傳焉

遠遊章句序

遠遊者屈原之所作也屈原履方直之行不容于世上
為讒佞所譖毀下為俗人所困極章皇山澤無所告訴
乃深惟元一修執恬漠思欲濟世則意中憤然文采秀
發遂敘妙思託配仙人與俱遊戲周歷天地無所不到
然猶懷念楚國思慕舊故忠信之篤仁義之厚也是以
君子珍重其志而瑋其辭焉

卜居章句序

卜居者屈原之所作也屈原履忠貞之性而見嫉妬念
讒佞之臣承君順非而蒙富貴已執忠直而身放棄心
迷惑不知所為乃往至太卜之家稽問神明決之著
龜卜已居世何所宜行冀聞異策以定嫌疑故曰卜居
也

漁父章句序

漁父者屈原之所作也屈原放逐在江湘之間憂愁嘆
吟儀容變易而漁父避世隱身釣漁江濱欣然自樂時

遇屈原川澤之域怪而問之遂相應答楚人思念屈原
因敘其辭以相傳焉

九辨章句序

九辨者楚大夫宋玉之所作也辨者變也謂激道德以
變說君也九者陽之數道之綱紀也故天有九星以正
璣衡地有九州以成萬邦人有九竅以通精明屈原懷
忠貞之性而被讒邪傷君闇蔽國將危亡乃援天地之
數列人形之要而作九歌九章之頌以諷諫懷王明已

所言與天地合度可履而行也宋玉者屈原弟子也閔惜其師忠而放逐故作九辨以述其志至於漢興劉向王褒之徒咸悲其文依而作詞故號為楚詞亦承其九以立義焉

招魂章句序

招魂者宋玉之所作也招者召也以手曰招以言曰召魂者身之精也宋玉憐哀屈原忠而斥棄愁懣山澤魂魄放佚厥命將落故作招魂欲以復其精神延其年壽

外陳四方之惡內崇楚國之美以諷諫懷王冀其覺悟而還之也

大招章句序

大招者屈原之所作也或曰景差疑不能明也屈原放流九年憂思煩亂精神越散與形離別恐命將終所行不遂故憤然大招其魂盛稱楚國之樂崇懷襄之德以比三王能任用賢公卿明察能薦舉人宜輔佐之以興至治因以風諫達己之志也

惜誓章句序

惜誓者不知誰所作也或曰賈誼疑不能明也惜者哀也誓者信也約也言哀惜懷王與已信約而復背之也古者君臣將共為治必以信誓相約然後言乃從而身以親也蓋刺懷王有始無終也

招隱士章句序

招隱士者淮南小山之所作也昔淮南王安博雅好古招懷天下俊偉之士自八公之徒咸慕其德而歸其仁

各竭才智著作篇章分造辭賦以類相從故或稱小山
或稱大山其義猶詩有小雅大雅也小山之徒閔傷屈
原又怪其文昇天乘雲役使百神似若仙者雖身沈沒
名德顯聞與隱處山澤無異故作招隱士之賦以章其
志也

七諫章句序

七諫者東方朔之所作也諫者正也謂陳法度以諫正
君也古者人臣三諫不從退而待放屈原與楚同姓無

相去之義故加為七諫慤慤之意忠厚之節也或曰七諫者法天子有爭臣七人也東方朔追閔屈原故作此辭以述其志所以昭忠信矯曲朝也

哀時命章句序

哀時命者嚴夫子之所作也夫子名忌與司馬相如俱好辭賦客遊于梁梁孝王甚奇重之忌哀屈原受性忠貞不遭明君而遇暗世斐然作辭嘆而述之故曰哀時命也

九懷章句序

九懷者諫議大夫王褒之所作也懷者思也言屈原雖
見放逐猶思念其君憂國傾危而不能忘也褒讀屈原
之文嘉其溫雅藻采敷衍執握金玉委之污瀆遭世溷
濁莫之能識追而愍之故作九懷以裨其詞史官錄第
遂列于篇

九歎章句序

九歎者護左都水使者光祿大夫劉向之所作也向以

博古敏達典校經書辯章舊文追思屈原忠信之節故作九歎歎者傷也息也言屈原放在山澤猶傷念君歎息無已所謂讚賢以輔志騁詞以曜德者也

九思章句序

九思者王逸之所作也自屈原終沒之後忠臣介士遊覽學者讀離騷九章之文莫不愴然心為悲感高其節行妙其麗雅至劉向王褒之徒咸嘉其義作賦騁辭以讚其志則皆列于譜錄世世相傳逸與屈原同土共國

悼傷之情與凡有異竊慕向褒之情作頌一篇號曰九思以裨其辭未有解脫故聊訓誼焉

論

折武論

苞含六藝游覽百家用道德為弓弩仁義為鎧甲

北堂書鈔

載王逸臨豫州教云舉遺逸于山藪黜奸邪于邦國

騷

九思

悲兮愁哀兮憂天生我兮當闇時被詆譖兮虛獲尤心
煩憤兮意無聊嚴載駕兮出戲遊周八極兮歷九州求
軒轅兮索重華世既卓兮遠眇眇握佩玖兮中路躇美
皋繇兮建典謨懿風后兮受瑞圖愍余命兮遭六極委
玉質兮於泥塗遽倬遑兮驅林澤步屏營兮行丘阿車
軌折兮馬虺頽憊悵立兮涕滂沱思丁文兮聖明哲哀
平差兮迷謬愚呂傳舉兮殷周興忌嚆專兮郢吳虛仰
長歎兮氣飲結悒殞絕兮活復蘇虎兕爭兮於廷中豺

狼關兮我之隅雲霧會兮日暝晦飄風起兮揚塵埃走
毫堂兮作東西欲竄伏兮其馬如念靈閨兮與重深輒
願竭節兮隔無繇望舊邦兮路委隨憂心悄兮志勤劬
魂恍恍兮不遑寐日眩眩兮寤終朝

右逢尤

令尹兮警警羣司兮讓讓哀哉兮溷溷上下兮同流叔
藟兮蔓衍芳藹兮挫枯朱紫兮離亂曾莫兮別諸倚此
兮巖穴永思兮窈悠嗟懷兮眩惑用志兮不昭將喪兮

玉斗遺失兮鈕樞我心兮煎熬惟是兮用憂集慕兮九
旬退顧兮彭務擬斯兮二蹤未知兮所投謠吟兮中野
上察兮璇璣大火兮西睨攝提兮運低雷霆兮礪礚電
霰兮霏霏奔電兮光晃涼風兮愴悽鳥獸兮驚駭相從
兮宿棲鴛鴦兮嗷嗷狐狸兮微微哀吾兮介特獨處兮
罔依螻蛄兮鳴東蟲蠶兮號西戴綠兮我裳燭入兮我
懷蟲豸兮夾余惆悵兮自悲佇立兮忉怛心結絹兮折
摧

右怨上

周徘徊兮漢渚求水神兮靈女嗟此國兮無良謀女詘
兮諛謔鸚雀列兮譁譁鵠鳴兮聒余抱昭華兮寶璋
欲銜鬻兮莫取言逝邁兮北徂叫我友兮配耦日陰曠
兮未光聞晞霏兮靡睹紛載驅兮高馳將諮詢兮皇羲
遵河皋兮周流路變易兮時乖瀉滄海兮東遊沐盥浴
兮天池訪太昊兮道要云靡貴兮仁義志欣樂兮反征
就周文兮邠岐秉玉英兮結誓日欲暮兮心悲惟天祿

兮不再背我信兮自違踰隴堆兮渡漠過桂車兮合黎
赴崑山兮串隸從盧敖兮棲遲吮玉液兮止渴齧芝華
兮療飢居嶮廓兮眇疇遠梁昌兮幾迷望江漢兮獲諾
心繫秦兮傷懷時肫肫兮且旦塵漠漠兮未晞憂不暇
兮寢食吒增歎兮如雷

右疾世

哀世兮睭睭譏譏兮嗌喔衆多兮阿媚翫靡兮成俗貪
枉兮黨比貞良兮乳獨鵠竄兮枳棘鶻集兮帷幄薊紫

兮青葱藁本兮萎落靚斯兮偽惑心為兮隔錯逡巡兮
圃藪率彼兮吟陌川谷兮淵淵山阜兮峒峒叢林兮崦
嵫林榛兮岳岳霜雪兮濯濯冰凍兮洛澤東西兮南北
罔所兮歸薄庇蔭兮枯樹匍匐兮巖石踉蹌兮寒局數
獨處兮志不申年齒盡兮命迫促魁繫擠推兮常困辱
含憂強老兮愁無樂鬚髮蔓頽兮顚鬢白思靈澤兮一
膏沐懷蘭英兮把瓊若待天明兮立躑躅雲濛濛兮電
儻爍孤鷗驚兮嗚嗚思怫鬱兮肝切剝忿悁悁兮孰

訴告

右憫上

悼屈子兮遭厄沈玉躬兮湘汨何楚國兮難化迄于今
兮不易士莫志兮焦裘競佞諛兮讒閱閱指正義兮為
曲訛璧玉兮為石鵲鵬遊兮華屋鷄鶩棲兮柴簇起奮
迅兮奔走違羣小兮謬詢載青雲兮上昇適昭明兮所
處躡天衢兮長驅踵九陽兮戲蕩越雲漢兮南濟秣余
馬兮河鼓霄霓紛兮晦翳參辰回兮顛倒逢流星兮問

路顧指我兮從左徑
嫫媿兮直馳御者迷兮失軌遂踣
達兮邪造與日月兮殊道志闕絕兮安如哀所求兮不
耦攀天階兮下視見鄢郢兮舊宇意逍遙兮欲歸衆穢
盛兮杳杳思哽噎兮詰詘涕流瀾兮如雨

右遭厄

嗟嗟兮悲夫殽亂兮紛拏茅絲兮同綠冠履兮共絢督
萬兮侍宴周召兮負蕩白龍兮見射靈龜兮執拘仲尼
兮困厄鄒衍兮幽囚伊余兮念茲奔遁兮隱居將升兮

高山上有兮猴猿欲入兮深谷下有兮虺蛇左見兮鳴
鵬右睹兮呼梟惶悸兮失氣踊躍兮距跳便旋兮中原
仰天兮增歎管蒯兮野莽崔葦兮千眠鹿蹊兮蹢蹢
貉兮蟬蟬鸛鷄兮軒軒鷄鷄兮甄甄哀我兮寡獨靡有
兮匹倫意欲兮沈吟迫日兮黃昏玄鶴兮高飛增逝兮
青冥鷁鷁兮喈喈山鵲兮嚶嚶鴻鷁兮振翅歸鴈兮于
征吾志兮覺悟懷我兮聖京垂屣兮將起跼蹐兮須明

右悼亂

惟昊天兮昭靈陽氣發兮清明風習習兮和煖百艸萌
兮華榮堇荼茂兮敷疏蘅芷彫兮瑩螟慙貞良兮遇害
將夭折兮碎糜時混混兮澆醜哀當世兮莫知覽往昔
兮俊彥亦詘辱兮係纆管束縛兮桎梏百貿易兮傳賣
遭桓繆兮識舉才德用兮列施且從容兮自慰玩瑟書
兮遊戲追中國兮逢隘吾欲之兮九夷超五嶺兮嵯峨
觀浮石兮崔嵬陟丹山兮炎野屯余車兮黃支就祝融
兮稽疑嘉已行兮無為乃回謁兮北逝遇神媯兮冥娛

欲靜居兮自娛心愁感兮不能放余轡兮策駟忽風騰
兮雲浮蹕飛杭兮越海從安期兮蓬萊緣天梯兮北上
登太一兮玉臺使素女兮鼓簧乘戈和兮謳謠聲噉詭
兮清和音晏衍兮要謠咸欣欣兮酣樂余眷眷兮獨悲
顧章華兮太息志戀戀兮依依

右傷時

昊天兮清涼玄氣兮高朗北風兮凜烈艸木兮蒼唐
呬呬兮噍噍唧蛆兮穰穰歲忽忽兮惟暮余感時兮悽愴

傷俗兮泥濁瞶蔽兮不章寶彼兮砂礫捐此兮夜光椒
瑛兮涅汙藁耳兮充房攝衣兮緩帶操戈兮魯陽昇車
兮命僕將馳兮四荒下堂兮見蠶出門兮觸蠶巷有兮
蚰蜒邑多兮螳螂睹斯兮嫉賊心為兮切傷俛念兮子
胥仰憐兮比干投劍兮脫冕龍屈兮蜿蜒潛藏兮山澤
甫匐兮叢攢窺見兮溪澗流水兮汙汙鼃鼃兮欣欣鱣
鮪兮延延羣行兮上下駢羅兮列陳自恨兮無友特處
兮煢煢冬夜兮陶陶雨雪兮冥冥神光兮頽頽鬼火兮

榮榮修德兮困控愁不聊兮遑生憂紆兮鬱鬱惡所兮
寫情

右哀歲

陟玉巒兮逍遙覽高岡兮嶢嶢桂樹列兮紛敷吐紫華
兮布條實孔鸞兮所居今其集兮惟鴉鳥鵲驚兮啞啞
余顧瞻兮怊怊彼日月兮闇昧障覆天兮侵氛伊我后
兮不聰焉陳誠兮効忠攄羽翮兮超俗遊陶遨兮養神
乘六蛟兮蛻蟬遂馳騁兮陞雲揚慧光兮為旗秉電策

兮為鞭朝晨發兮鄢郢食時至兮增泉繞曲阿兮北次
造我車兮南端謁玄黃兮納贄崇忠貞兮彌堅歷九宮
兮徧觀睹秘藏兮寶珍就傳說兮騎龍與織女兮合婚
舉天畢兮掩邪敷天弧兮射姦隨真人兮翱翔食元氣
兮長存望太微兮穆穆睨三階兮炳分相輔政兮成化
建烈業兮垂勲日警警兮西沒道遐迴兮阻歎志穉積
兮未通悵敞罔兮自憐

右守志

亂曰天庭明兮雲霓藏三光朗兮鏡萬方
斥蜥蜴兮進龜龍策謀從兮翼璣衡配稷契兮恢唐功嗟英俊兮未為雙

詩

琴思楚歌

盛陰修夜何難曉思念糾戾腸摧繞時節晚暮年齒老
冬夏更運去若頽寒來暑往難逐追形容減少顏色虧
時忽晻晻若驚馳意中私喜施用為內無所恃失本義

志願不得心肝沸憂懷感結重嘆噫歲月已盡去奄忽
亡官失祿去家室思想君命幸復位久處無成卒放棄

漢魏六朝百三家集卷二十

欽定四庫全書

漢魏六朝百三家集卷二十一

漢孔融集題詞

魯國男子孔文舉年大於曹操二歲家世聲華
曹氏不敵其詩文益非操所敢望也操殺文舉
在建安十三年時僭形已彰文舉既不能誅之
又不能遠之並立衰朝戲謔笑傲激其忌怒無
啗肉餒餒虎此南陽管樂所深悲也曹丕論文

首推北海金帛募錄比於揚班脂元升往哭文
舉官以中散不好賢知文十倍於操然令文舉
不死親見漢帝禪受當塗盜鼎亦必舉族沈焚
所恨者其死先操狐鼠晏行攘袂之日天下遂
無孔父仇牧耳文舉天性樂善甄臨配食虎賁
同坐死不相負何況生存盛憲困於孫權葆首
急難襁衡謝該淪落下士抗章推舉今讀其書
表如鮑子復生禽息不沒彼之大度豈止六國

四公子乎而道窮命盡不能庇九歲之男七歲
之女天道無親其言不信猶黨錮餘烈哉陳畱
路粹中郎弟子也呈身漢賊奏殺賢者與馬融
役於梁冀等耳東漢詞章拘密獨少府詩文豪
氣直上孟子所謂浩然非耶琴堂衣冠客滿酒
盈予尚能想見之

目錄

表疏

薦禰衡表

崇國防疏

上書

薦謝該上書

上漢帝書

奏宜准古王畿制書

闕

上三府所辟稱故吏事

闕

奏馬賢事

闕

對

東海王祭禮對

開

教

告高密縣立鄭公鄉教

修鄭公宅教

告昌安縣教

下高密恤鄧子然教

答王修教

又

書

與曹操論盛孝章書

與曹操論酒禁書

又

與曹操討烏桓書

報曹操書

答虞翻書

與韋甫休書

又

與王朗書

與張紘書

又

喻邴原書

與邴原書

與諸卿書

與宗從弟書

與許博士書

論

汝穎優劣論

聖人優劣論

又

周武王漢高祖論

議

馬日碑不宜加禮議

肉刑議

碑

衛尉張儉碑

詩

離合作郡姓名字詩

雜詩二首

臨終詩

六言三首

失題

漢魏六朝百三家集卷二十一 目錄

欽定四庫全書

漢魏六朝百三家集卷二十一

明 張溥 輯

漢孔融集

表疏

薦禰衡表

臣聞洪水橫流帝思俾乂旁求四方以招賢俊昔世宗
繼統將弘祖業疇咨熙載羣士響臻陛下獻聖纂承基

緒遭遇厄運勞謙日仄惟嶽降神異人竝出竊見處士
平原禰衡年二十四字正平淑質貞亮英才卓犖初涉
藝文升堂覩奧目所一見輒誦於口耳所暫聞不忘於
心性與道合思若有神弘羊潛計安世默識以衡準之
誠不足怪忠果正直志懷霜雪見善若驚疾惡若讐任
座抗行史魚厲節殆無以過也鷙鳥累百不如一鶚使
衡立朝必有可觀飛辯騁辭溢氣全涌解疑釋結臨敵
有餘昔賈誼求試屬國詭繫單于終軍欲以長纓牽致

勁越弱冠慷慨前世美之近日路粹嚴象亦用異才擢
拜臺郎衡宜與比如得龍躍天衢振翼雲漢揚聲紫微
垂光虹蜺足以昭近署之多士增四門之穆穆鈞天廣
樂必有奇麗之觀帝室皇居必畜非常之寶若衡等輩
不可多得激楚陽阿至妙之容賞伎者之所貪飛兔騶
裏絕足奔放良樂之所急也臣等區區敢不以聞陛下
篤慎取士必須効試乞令衡以褐衣召見必無可觀采
臣等受面欺之罪

崇國防疏

竊聞領荊州牧劉表桀逆放恣所為不軌至乃郊祭天
地擬儀社稷雖昏僭惡極罪不容誅至於國體宜且諱
之何者萬乘至重天王至尊身為聖躬國為神器陞級
縣遠祿位限絕猶天之不可階日月之不可踰也每有一
豎臣輒云圖之若形之四方非所以杜塞邪萌愚謂雖
有重戾必宜隱忍賈誼所謂擲鼠忌器蓋謂此也是以
齊兵次楚唯責包茅王師敗績不書晉人前以露索術

之罪今復下劉表之事是使跛牂欲闚高岸天險可得而登也案表跋扈擅誅列侯遏絕詔命斷盜貢篚招呼元惡以自營衛專為羣逆主萃淵藪郤鼎在廟章孰甚焉桑落瓦解其執可見臣愚以為宜隱郊祀之事以崇國防

上書

薦謝該上書

臣聞高祖創業韓彭諸將征討暴亂陸賈叔孫通進說

詩書光武中興吳耿佐命范升衛宏修述舊業故能文
武並用成長久之計陛下聖德欽明同符二祖勞謙凡
運三年乃讎今尚父鷹揚方叔翰飛王師電驚羣凶破
殄始有橐弓臥鼓之次宜得名儒典綜禮紀竊見故公
車司馬令謝該體曾史之淑性兼商偃之文學博通羣
藝周覽古今物來有應事至不惑清白異行敦悅道訓
求之遠近少有疇匹若乃巨骨出吳雉集陳庭黃熊入
寢亥有二首非夫洽聞者莫識其端也雋不疑定北闕

之前夏侯勝辯常陰之驗然後朝士益重儒術今該實卓然比跡前列間以父母老疾棄官欲歸道路險塞無由自致猥使良才抱璞而逃踰越山河沈淪荆楚所謂往而不反者也後日當更饋樂以釣由余尅像以求傳說豈不煩哉臣愚以為可推錄所在召該令還楚人止孫卿之去國漢朝追匡衡於平原尊儒貴學惜失賢也

上漢帝書

先帝褒厚老臣懼其殞越是故扶接助其氣力三公刺

腋近為憂之罪驚戒也云備大臣非其類也

教

告高密縣立鄭公鄉教

昔齊置士鄉越有君子軍皆異賢之意也鄭君好學實懷明德昔太史公廷尉吳公謁者僕射鄧公皆漢之名臣又南山四皓有園公夏黃公潛光隱耀世加其高皆悉稱公然則公者仁德之正號不必三事大夫也今鄭君鄉宜曰鄭公鄉昔東海于公僅有一節猶或戒鄉人

侈其門閭矧乃鄭公之德而無駟牡之路可廣開門衢
令容高車號為通德門

修鄭公宅教

玄在徐州文舉欲其還郡教
請懇惻使人繼蹟又教曰

鄭公久遊南夏今艱難稍平儻有歸來之思無寓人於
我室毀傷其藩垣林木必繕治牆宇以俟還

告昌安縣教

邑人高幼自言辟得井中鼎夫鼎久潛于井德之休明

雖小重也黃耳金鉉利貞之象國遭凶荒彝器出或者
明以饗人

下高密恤鄧子然教

志士鄧子然告困焉得愛金庾之間以傷烈士之心與
豆三斛後之復言

答王修教

修為孔融主簿舉孝
廉修讓邴原融不聽

原之賢也吾已知之矣昔高陽氏有才子八人堯不能

用舜寶舉之原可謂不患無位之士以遺後賢不亦可乎

又答

修重辭
融答

掾清身潔已歷試諸難謀而鮮過惠訓不倦余嘉乃勲
應乃懿德用升爾于王庭其可辭乎

書

與曹操論盛孝章書

憲字孝章會稽人初為臺郎路逢融時十餘歲載歸與言知其奇尋舉孝廉補尚書郎稍遷吳郡太守以疾去官歸鄉里孫策平吳忌憲名囚之融與操書由是徵為騎都尉徵命

未至為孫

權所害

歲月不居時節如流五十之年忽焉已至公為始滿融又過二海內知識零落殆盡惟會稽盛孝章尚存其人困於孫氏妻孥湮沒單子獨立孤危愁苦若使憂能傷人此子不得復永年矣春秋傳曰諸侯有相滅亡者桓公不能救則桓公恥之今孝章實丈夫之雄也天下談

士依以揚聲而身不免於幽繫命不期於旦夕是吾祖
不當復論損益之友而朱穆所以絕交也公誠能馳一
介之使加咫尺之書則孝章可致友道可弘矣今之少
年喜謗前輩或能譏評孝章孝章要為有天下大名九
牧之人所共稱歎燕君市駿馬之骨非欲以騁道里乃
當以招絕足也維公匡復漢室宗社將絕又能正之正
之之術實須得賢珠玉無蹊而自至者以人好之也况
賢者之有足乎昭王築臺以尊郭隗隗雖小才而逢大

遇竟能發明主之至心故樂毅自魏往劇辛自趙往鄒
衍自齊往嚮使郭隗倒懸而王不解臨溺而王不拯則
士亦將高翔遠引莫有北首燕路者矣凡所稱引自公
所知而復有云者欲公崇篤斯義也因表不悉

與曹操論酒禁書

公初當來邦人咸抃舞踊躍以望我后亦既至止酒禁
施行夫酒之為德久矣古先哲王類帝禋宗和神定人
以齊萬國非酒莫以也故天垂酒星之耀地列酒泉之

郡人著旨酒之德堯不干鍾無以建太平孔非百觚無
以堪上聖樊噲解厄鴻門非豕肩鍾酒無以奮其怒趙
之厮養東迎其主非引卮酒無以激其氣高祖非醉斬
白蛇無以暢其靈景帝非醉幸唐姬無以開中興素盞
非醇醪之力無以脫其命定國不酣飲一斛無以決其
法故酈生以高陽酒徒著功於漢屈原不餉醴醕取
困於楚由是觀之酒何負於政哉

又書

昨承訓答陳二代之禍及衆人之敗以酒亡者實如來
誨雖然徐偃王行仁義而亡今令不絕仁義燕噲以讓
失社稷今令不禁謙退魯因儒而損今令不棄文學夏
商亦以婦人失天下今令不斷婚姻而將酒獨急者疑
但惜穀耳非以亡王為戒也

啁曹操討烏桓書

大將軍遠征蕭條海外昔肅慎氏不貢楛矢丁零盜蘇
武牛羊可并案也

報曹操書

猥惠書教告所不逮融與鴻豫州里比鄰知之最早雖
嘗陳其功美欲以厚於見私信於為國不求其覆過掩
惡有罪望不坐也前者黜退歡欣受之昔趙宣子朝登
韓厥夕被其戮喜而求賀况無彼人之功而敢枉當官
之平哉忠非三閭智非鼂錯竊位為過免罪為幸乃使
餘論遠聞所以慙懼也朱彭寇賈為世壯士愛惡相攻
能為國憂至於輕弱薄劣猶昆蟲之相嚼適足還害其

身誠無所至也晉侯嘉其臣所爭者大而師曠以為不
如心競性既遲緩與人無傷雖出勝下之負榆次之辱
不知貶毀之於己猶蚊蚋之過也子產謂人心不相似
或矜執者欲以取勝為榮不念宋人待四海之客大壚
不欲令酒酸也至於屈穀巨鉤堅而無竅當以無用罪
之耳他者奉尊嚴教不敢失墜郗為故吏融所推進趙
衰之拔卻穀不輕公叔之升臣也知同其愛訓誨發中
雖懿伯之忌猶不得念況恃舊交而欲自外於賢吏哉

輒布腹心修好如初苦言至意終身誦之

答虞翻書

示所著易傳自商瞿以來舛錯多矣去聖彌遠衆說騁
辭曩聞延陵之理樂今覩吾君之治易知東南之美者
非但會稽之竹箭焉又觀象雲物察應寒溫推本禍福
與神合契可謂探賾旁通者已方世清聖上求賢者梁
丘以卦筮寧世劉向以洪範昭名想當來翔追蹤前列
相見乃盡不復多陳

與韋甫休書

使君足下懷遠垂勲西戎即叙前別意恨甚多不悉辛
從事至承獲所訊喜而起居不恙而到也云便結駟徑
至舊治西土之人宗服令德解仇崇好以順風化萬里
雍穆如樂之和雖為國家威靈感應亦實士穀堪事之
效也昔伯安由幽都而登上司子琰以豫州而取宰相
近事未遠當勉功業以豐此慶耳間僻疾動不得復與
足下岸幘廣坐舉杯相於以為邑邑

又

前日元將來淵才亮茂雅度弘毅偉世之器也昨日仲將又來懿性貞實文敏篤誠保家之主也不意雙珠近出老蚌甚珍貴之

與王朗書

朗漢末為會稽太守孫策渡江畧地與策戰敗績乃詣策令使語讓朗對謝服曹操為司空表徵之未至融與之書朗自曲阿展轉江海積年乃至拜諫議大夫叅司空軍事

世路隔塞情問斷絕感懷增思前見章表知尋湯武罪

已之迹自投東裔同鯨之罰覽省未周涕隕潛然主上
寬仁貴德宥過曹公輔政忠賢竝立策書屢下殷勤款
至知擢舟浮海息駕廣陵不意黃熊突出羽淵也談笑
有期勉行自愛

與張紘書

紘為孫策奉章至許宮留為侍御史融等皆
與親善後曹操聞策薨令紘輔權內附出紘
為會稽東部都尉及權討江夏以東部
少事命紘居守遙領所職融遺紘書

聞大軍西征足下畱鎮不有居者誰守社稷深固折衝

亦大勲也無乃李廣之氣循髮益怒樂一當單于以盡
餘憤乎南北竝定世將無事孫叔投戈絳灌俎豆亦在
今日但用離析無緣會面為愁歎耳道直途清相見豈
復難哉

又

絃既好文學又善楷篆與
融書自書融遺絃書美之

前勞手筆多篆書每舉篇見字欣然獨笑如復覩其人
也

喻邨原書

原初署北海功曹融為太守以原為計佐是時漢朝陵遲政以賄成原乃將家人入鬱洲山中郡舉有道融以書喻原原遂到遼東

修性保真清虛守高危邦不入久潛樂王王室多難西遷鎬京聖朝勞謙疇咨雋乂我徂求定策命懇惻國之將隕廢不恤緯家之將亡緹縈跋涉彼匹婦也猶執此義實望根矩仁為己任授手援溺振民於難乃或晏晏居息莫我肯顧謂之君子固如此乎根矩根矩可以來

矣

與邨原書

原自遼東欲歸鄉里止於三山融移書
與之原於是復返積十餘年後乃適還

隨會在秦賈季在翟諮仰靡所歎息增懷頃知來至近
在三山詩不云乎來歸自鎬我行永久今遣五官掾奉
問榜人舟楫之勞禍福動靜告慰亂階未已阻兵之雄
若暴奕爭梟

與諸卿書

鄭康成多臆說人見其名學謂有所出也證案大較要在五經四部書如非此文近為妄矣若子所執以為郊天鼓必當麒麟之皮也寫孝經本當曾子家策乎

與宗從弟書

知晚節豫學既美大弟困而能寤又合先君加我之義豈惟仁弟實專承之凡我宗族猶或賴焉

與許博士書

許博士為漢
樂器融與書

今足下遠以彝器金石並志為國家來儀之瑞亦丈夫之大勲

論

汝潁優劣論

融以汝南士勝潁川士陳長文難融答之曰汝南戴子高親止千乘萬騎與光武皇帝共於道中潁川士雖抗節未有頡頏天子者也汝南許子伯與其友人共說世俗將壞因夜舉聲號哭潁川雖憂時未有能哭世者也

汝南府許掾教太守鄧晨圖開稻陂數萬頃累世獲其功夜有火光之瑞韓元長雖好地理未有成功見效如許掾者也汝南張元伯身死之後見夢范巨卿潁川士雖有奇異未有能神而靈者也汝南應世叔讀書五行俱下潁川士雖多聰明未有能離婁竝照者也汝南李洪為太尉掾弟殺人當死洪自劾詣閣乞代弟命便飲酖而死弟用得全潁川士雖尚節義未有能殺身成仁如洪者也汝南翟子威為東郡太守始舉義兵以討王

莽潁川士雖疾惡未有能破家為國者也汝南袁公著
為甲科郎上書欲治梁冀潁川士雖慕忠讜未有能投
命直言者也

聖人優劣論

荀愜等以為聖人俱受乾坤之醇靈稟造化之和氣該
百行之高善備九德之淑懿極鴻源之深闊窮品物之
情類曠蕩出於無外沈微淪於無內器不足周不充聖
極荀以孔子稱大哉堯之為君也唯天為大唯堯則之

是爲覆蓋衆聖最優之明文也孔以堯作天子九十餘年政化洽於民心雅頌流於衆聽是以聲德發聞遂爲稱首則易所謂聖人久於其道而天下化成百年然後勝殘去殺必世而後仁者也故曰大哉堯之爲君也堯之爲聖也明其聖與諸聖同但以大見稱爲君爾

又

馬之駿者名曰騏驎犬之駿者名曰韓盧犬之有韓盧馬之有騏驎人之聖也名號等設騏驎與韓盧竝是寧

能頭尾相當八脚如一無有先後之覺矣

周武王漢高祖論

周武王從后稷以來至其身相承積五十世俱有魚鳥之瑞至高祖一身修德瑞遽有四呂公望形而薦女呂后見雲知其處白蛇分神母哭西入關五星聚又武王伐紂斬而刺之高祖入秦赦子嬰而遣之是寬裕又不如高祖也

議

馬日碑不宜加禮議

日碑以上公之尊秉髦節之使銜命直指寧輯東夏而曲媚姦臣為所牽率章表署用輒使首名附下罔上姦以事君昔國佐當晉軍而不撓宜僚臨白刃而正色王室大臣豈得以見脅為辭又袁術僭逆非一朝一夕日碑隨從周旋歷歲漢律與罪人交關三日已上皆應知情春秋魯叔孫得臣卒以不發揚襄仲之罪貶不書日鄭人討幽公之亂斲子家之棺聖上哀矜舊臣未忍追

案不宜加禮

肉刑議

古者敦龐善否區別吏端刑清治無過失百姓有罪皆自取之末世凌遲風俗壞亂政撓其俗法害其民故曰上失其道民散久矣而欲繩之以古刑投之以殘棄非所謂與時消息者也紂斲朝涉之脰天下謂為無道夫九牧之地千八百君若各刑一人是天下常有千八百紂也求世休和弗可得已且被刑之人慮不念生志在

思死類多趨惡莫復歸正夙沙亂齊伊戾禍宋趙高英
布為世大患不能止人遂為非也適足絕人還為善耳
雖忠如鬻拳信如卞和智如孫臏寬如巷伯才如史遷
達如子政一罹刀鋸沒世不齒是太甲之思庸穆公之
霸秦南睢之骨立衛武之初筵陳湯之都賴魏尚之守
邊無所復施也漢開改惡之路凡為此也故明德之君
遠度深惟棄短就長不苟革其政者也

碑

衛尉張儉碑

其先張仲實以孝友左右周室晉主夏盟而張老延君
譽於四方君稟乾綱之正性蹈高世之殊軌冰潔淵清
介然特立雖史魚之勵操叔向之正色未足比焉中常
侍同郡侯覽專權王命豺虎肆虐威震天下君以西都
督郵上覽禍亂凶國之罪鞠沒賊姦以巨萬計俄而制
書案驗部黨君為覽所陷亦章名捕逐當世英雄授命
殞身以籍濟君厄者蓋數十人故克免斯艱旋宅舊宇

衆庶懷其德王公慕其聲州宰爭命辟大將軍幕府公
車特就家拜少府皆不就也復以衛尉徵明詔嚴切勅
州郡乃不得已而就之銘曰

桓桓我君應天淑靈皓素其質允迪忠貞肆志直道進
不為榮赴戟驕臣發如雷霆凌剛摧堅視危如寧

詩

離合作郡姓名字詩

漁父屈節水潛匿方

離魚字

與肯進止出行施張

離日字
魚日合

成呂公磯釣闔口渭傍離口字九域有聖無土不王離或字口

或合為國好是正直女回于匡離子字海外有截隼逝鷹揚離當

離字字恐古文與今文不同合成孔也六翮將奮羽儀未彰離馬字虵龍之蟄

俾也可忘離出字玫瑰隱曜美玉韜光去玉成文不須合無名

無譽放言深藏離與字按轡安行誰謂路長離才字合成舉

雜詩二首

巖巖鍾山首赫赫炎天路高明曜雲門遠景灼寒素昂
昂累世士結根在所固呂望老匹夫苟為因世故管仲

小囚臣獨能建功祚人生有何常但患年歲暮幸托不肖軀且當猛虎步安能苦一身與世同舉厝由不慎小節庸夫笑我度呂望尚不希夷齊何足慕

遠送新行客歲暮乃來歸入門望愛子妻妾向人悲聞子不可見日已潛光輝孤墳在西北常念君來遲褰裳上墟丘但見蒿與薇白骨歸黃泉肌體乘塵飛生時不識父死後知我誰孤魂遊窮暮飄飄安所依人生圖享息爾死我念追俛仰內傷心不覺淚沾衣人生自有命

但恨生日希

臨終詩

言多令事敗器漏苦不密河潰蟻孔端山壞由猿穴涓涓江漢流天窻通冥室讒邪害公正浮雲翳白日靡辭無忠誠華繁竟不實人有兩三心安能合為一三人成市虎浸漬解膠漆生存多所慮長寢萬事畢

六言詩三首

漢家中葉道微董卓作亂乘衰借上虐下專威萬官惶

怖莫違百姓慘慘心悲

郭李分爭為非遷都長安思歸瞻望關東可哀夢想曹

公歸來

從洛到許巍巍曹公憂

一作輔

國無私減去厨膳甘肥羣

僚率從祈祈雖得俸祿常飢念我苦寒心悲

失題

歸家酒債多問客粢幾

一作成

行高談滿四座一日傾千

觴



漢魏六朝百三家集卷二十一